





原件短缺

卷8



原件短缺

P1-P5

橫涇之捷

嘉靖三十四年八月

嘉靖乙卯秋八月倭賊自象山登岸流突南京焚安定門  
殺一把總一指揮走無錫而南都御史曹公邦輔引兵馳  
護

孝陵因追及於蘇州之泚墅賊驕蹇益甚公與副使王崇  
古僉事董邦政知府林懋舉知縣康世耀把總姜宇曰此  
賊勢埒數千勅敵我地形兵力爲彼所窺他日大舉入寇  
何以支之誓滅此而後入城乃分授信地申主客應援之  
規以崇古邦政宇率指揮張大綱武生車梁躡賊所向遇  
敵先登爲正兵懋舉世耀各領兵屯吳林廟之左北護郡  
城南扼賊衝爲援兵嚴家兵左哨沙兵右哨分突衝截爲  
奇兵度賊走太湖募水兵于湖濱東山巡檢領船數十往

來探哨爲遊兵又度賊不走太湖必分踪以牽制我師或棄金帛于道餌我嚴諭毋離伍毋拾遺士皆股栗殊死戰賊至吳林廟我兵擒斬二十七人餘走揚山迤至靈巖奪民船由新港出太湖欲走洞庭見我兵旗幟不敢渡復登岸至橫涇前馬橋匿一民舍我兵圍而火攻之賊潰出道伏田禾中不能得車梁捫其所殺人肉尚未寒又草露未動乃令衆大呼賊在此賊果驚出遂俘斬之無一人得脫者而大綱手刃數人力盡死之始賊之在無錫也欲寄徑常熟往附柘林之賊劫二人前數十武導之常熟在無錫之北二人給之而南且道辟行人曰賊至矣報官兵賊已陷絕地速來可盡擒也賊比敗恨二人入骨競鬻割之嗚呼是賊以五十三人馳突八郡轉戰三千餘里所過皆不

焚掠唯與敵者殺之此其勢其志可知也已非曹公之定策群有司之戮力蘇松之禍未已也雖然張大綱之死敵二人之給賊其功固非碌碌者惜二人之姓字不傳爾

縣學生龔良相撰

崑山

後梅之捷

嘉靖三十四年十一月

嘉靖乙卯冬十一月倭賊自福建福寧州之連江洪流入浙境越平陽仙居至寧波奉化與錢倉賊合幾七百人深入紹興勢益滋蔓提督都御史胡公宗憲親督兵備副使許東望容美土目田九霄同知曲入繩等兵往戡之遇賊江橋僅隔一河公謂諸將曰賊見我不顧而南其氣未可乘若稍止觀望可圖也吾茲試之乃於馬上自持一幟作指揮狀賊果聚觀公笑曰此易與耳乃令兵渡河九霄邀其前入繩襲其後賊見兩兵迭至大怖而走至後梅匿民家公復大笑曰賊若乘我兵半渡迎擊勝負猶未可量今已投死地復何能爲乃悉衆圍之三匝縱火焚之死者強半值天雨公與將士立田中夜一鼓大霧咫尺莫辨賊乘

後梅一掃  
八  
八  
黑衝典史吳成器軍成器故善戰驅兵四面奮擊之擒斬復若干人然脫走者猶衆公計賊必由山西嶺而遁嶺之巔可伏也命設伏以待夜將半賊果至遂大敗之斬首及焚死者積五百二十有奇餘奔太平蒲岐港官兵復追之賊堅壁不出乃夜偪賊壘投以霹靂火器謹若劫營者賊驚起自相攻擊死者又若干人得脫者無幾竟出洋去丙辰春正月也時公新膺簡命未浹旬輒有奇捷如此

烏程縣學教諭張節撰

清風嶺之捷

嘉靖三十四年十一月

嘉靖乙卯冬十一月倭船三艘艤南麂之西麓提督都御史胡公預設海艦封守甚固二船不能入揚帆而東其一西走我兵躡之沉其舟追入畧內相持八晝夜賊窘甚從山後竊划船逸去颶風驅回登劫大畧至三港守備劉隆千戶劉綱百戶張澄戰歿於陣賊勢復熾遂越金鄉趨台州以漸北向時公方奏樂清之捷會台州告急公笑曰寇來有三敗我皆得之不足平也初寇登平陽守將不循約束故得深入今台守譚綸干城之將且素受方畧賊玩蹂其疆一兵法小敵之堅大敵之擒寇方得志三港其氣驕我兵方捷於樂清其氣勁以勁乘驕如拉朽耳二容美兵精悍甲諸部萬里從征朝氣正銳但初未諳險阨今授

以布伏邀擊之法則爲全勝之技二遂命分道布截天台以南綸兵當之新昌以北容美兵當之綸兵逼壘而進以典史吳成器統部署爲前哨報効吏章延廩爲後哨百戶王世仁陳濠督徒卒伏於小江道左知事張東督鄉兵伏於顏坑諸處而又迎賊所向預置藥蜜藥餅餌之由是賊或中伏或中毒擒獲三十餘顆傷死者不計始悔入台州境十二月抵新昌知應台關有備去至嵎縣三界上館嶺會容美兵陳而待田九霄以正兵當其前田九章援兵繼進左翼則留守王倫伏兵當之右翼則經歷畢爵伏兵當之指揮吳江率部兵遠賊後背夾擊且多張旗幟爲疑兵以撼賊勢賊四面受敵且戰且走我兵追之入清風嶺烈女祠俘斬一百七十餘是鯨也賊二百餘徒歷温台紹三

郡始克勦滅其敢於深入者猶恃紹興之倭欲與合夥迨越台州始知舊倭已破於是旣畏譚兵不敢南復畏土兵不敢北卒至於敗如公所料云

武進舉人  
吳嶽撰



仙居之捷

嘉靖三十五年

嘉靖丙辰春二月

朝廷以都御史胡公某累建奇勲命以兵部侍郎總督浙直福建軍務會福建桐山之賊流逼浙境同知黃釗指揮梅魁禦之賊潰圍北走公密令副使劉慈預伏兵塔石蕉蒲諸山巖險阨則潛置火器以待仍列舟師於山側之江濱賊至伏起殺傷甚衆遁由天門埭至平陽青田越小峙沿江而南遂入荆溪荆溪通仙居樂清之孔道也時臨海天台業已受公計集鄉兵守黃潭箬孔中渡由是賊不得犯寧紹由烏杭西入仙居乘城築未完衝突焚劫慘倍他地乃咨提督都御史阮公鶚馳救之復行副使許東望知府譚綸總兵盧鏜兵從東路而進賊聞大兵且至遂走斷

橋彭溪巢於民舍我兵合圍攻之俘斬三百餘級焚溺死者無算所存六十餘人取道天台之北復爲赤城民兵所殺是時浙東西硤石梁湖之賊各萬餘人俱薄會城甯築難制江南北新舊屯據者數亦逾萬公以一身寄諸藩之安危以一心當百萬之兵甲隨機督勦筭無遺策直隸有寶山之捷兩浙有西庵清水窪之捷而桐山流寇亦旋就殄戮謂公今之子儀非耶

嘉靖訓導  
謝顧撰

乍浦之捷

嘉靖三十五年七月

嘉靖丙辰秋七月賊徐海陳東之解桐鄉圍而東也陽爲聽撫心實狐疑自呂港新場移屯乍浦城南營嚴絡繹改脩舊船以備出海且窺伺我兵強弱爲其進止總督侍郎胡公 策知其計因外示羈縻而密檄副使劉燾尙之會尙書趙公文華再

命督察至公乃與定議以乍浦西南海塘可通杭州咨浙福提督都御史阮公鶚偕郎中郭仁副使徐洛總兵徐珏等壁海鹽以遏犯杭之路東北金山可通松江浦東咨直隸提督都御史張公景賢駐松江而參政任環僉事董邦政留守王倫同知熊粹容美土官田九霄等扼青村黃浦及出海之路公親督大兵與參政汪栢參議王詢等駐平

湖與賊偏壘而陣總兵俞大猷盧鏜等則以舟師設伏洋山馬蹟邀其歸路分布既定候間而發適上海之賊由吳淞而西南出復萬餘人公恐海或中變與之連衡急囑海使東出擊賊可得舟還島海以為然巢逆斬賊數百賊遂夜走以故海不及取其舟而返其他酋長脫出海者公已別遣大猷伏飛艦海上遮擊之溺且盡公又計海書記麻葉不矩無以堅其內附之心而陳東者與麻葉聲相倚桐鄉之後與海相睚眦者也於是又計令海縛麻葉縛陳東以獻海遂併有其衆而諸酋長則疑且怨海矣海自度進退無所而公故與趙公簿責海益急因遣謀私海令其誘衆俘斬之以謝可無罪海不得已從之遂與定約與前縛麻葉陳東等俱詳見鹿門茅氏所為剿徐海本末紀公乃令副使劉燾引遊擊尹秉衡

兵夜伏于浦城中而徐珏等兵分為二哨進壁白馬廟左灝等兵由平湖間道而出主簿曹廷慧參將丁僅等壁乍浦城以為內援至期珏等移營瓦山海果挈妻走海上艘群倭爭逐之大亂城上舉火我兵四合競進大敗之燒賊巢廠二十餘里時海執稱歸順投梁庄去諸遁出海洋者大猷兵邀擊之前後俘斬七百有奇沒海及焚死者無筭乍浦之賊無孑遺矣夫徐海以首惡煽禍而陳東麻葉等為之犄角勾引外夷侵擾中土受其螫毒者五年矣丙辰春擁衆數萬分道入寇北犯瓜楊阻絕運道東掠寧紹宰制我師聲言欲下杭州犯留都比之曩時猖獗尤甚公相度機宜不輕與爭鋒捐千金賞敢死之士用間誘退呂港賊艘以伐其深犯之謀復誘令殺賊立功以剪其羽翼之

勢擒麻葉擒陳東度其孤危可以取矣猶謂困獸死鬪乃  
故弃船海濫開一面之缺而卒以遊兵邀之無一得脫者  
後先下着不爽纖微島夷之所以畏服而東南之所以奠  
安者不以此哉不以此哉

餘姚舉人  
諸大圭撰

### 紀剿徐海本末

嘉靖丙辰徐海之擁諸倭奴而寇也一枝由海門入掠  
維揚東控京口一枝由淞江入掠上海一枝由定海  
關入掠慈谿等縣衆各數千人而海自擁部下萬餘  
人直逼乍浦而岬岬則破諸舟悉焚之令人人各爲  
死戰又導故窟柘林者陳東所部數千人與俱併兵  
攻乍浦城蓋四月十九日也當是時

朝廷方奪故總督而新總督胡公自提督代之甫八日問  
幕府麾下募卒僅二千人俱孱弱不可用故總督所  
徵四川湖廣山東河南諸兵俱罷去所爲緩急者特  
容美土兵千人及叅將宗禮所藉河朔之兵八百人  
耳南北諸倭酋不下數萬謀者聲言他酋分掠於江

淮吳越諸州郡間以扼援兵而海等當窟乍浦下杭  
州席卷蘇湖以脅金陵氣恣甚總督胡公方召諸司  
畫計無何故提學阮公代胡公爲提督檄未至夜半  
聞乍浦圍卷甲趨之胡公亦分遣兵敢浦海鹽之間  
爲聲援而自引兵壁塘栖相犄角居頃之海聞新總  
督胡公卽故御史所嘗提兵督戰於鶯湖王涇之間  
而覆之者氣稍阻尋罷乍浦圍聞兩公方擁兵壁近  
郊不復敢窺杭於是徑略峽石越皂林出烏鎮以北  
烏鎮者卽海故所犯蘇湖舊路也當是時胡公旣獲  
謀度蘇湖之間惟鶯湖爲四戰之地於是檄河朔兵  
自嘉興入駐勝墩陣而待因以吳江水兵遮其前湖  
州水兵尾其後而公自引麾下募卒及容美土兵衝

擊之提督阮公自崇德聞賊且出烏鎮也卽道挾河  
朔之兵騎而馳及之於皂林令善射者且躡且射賊  
稍稍引去賊縱數百人嘗之輒又敗去賊怒甚鼓噪  
而前提督阮公勢皇急於是走輕舸入保桐鄉而叅  
將宗禮與裨將霍貫道等乃自張左右翼厚集其陣  
以待戰數合擊殺數十人會日暮賊且引去時賊氣  
頗窘而宗禮霍貫道等亦已絕嚮道不得擇善地便  
水草以自休止明日餓而戰賊遣候者樹而望蓋孤  
壘以塹無他援者也大喜復縱兵以半擊其前以半  
繞其背而霍貫道河朔故驍將也大呼衆力戰矢砲  
如雨下無不人人一當十復擊殺數十百人而貫道  
亦手自刃十餘人賊益怖海且中砲欲馳去會火藥

盡霍貫道而宗禮仰天呼曰吾兩人再得藥數斗可  
以了此賊矣未幾貫道與宗禮俱陷衆大敗賊遂乘  
勝圍桐鄉時總督胡公已引兵躡崇德聞之潛然流  
涕曰河朔之兵旣敗東南之事無復可支矣賊已困  
桐鄉假令復分兵困崇德以劫我我兩人譬之抱石  
而自沉也

國家且柰何於是還省城檄諸路兵爲戰守計先是公始  
爲提督時嘗與監督尚書趙公謀曰

國家困海上之寇數年於茲矣諸倭奴乘潮出沒將士所  
不得斥堠而戍者人言王直以威信雄海上無他罪  
狀苟得誘而使之或可陰携其黨也按部題亦嘗有  
用間爲策者於是遣辯士蔣洲陳可願及故嘗與王

直友善者數輩入海諭直直果感悅願如約遣其養  
子毛海峰欵定海關謝過間以諭海海已勾陸摩諸  
島人入劫故不相及而海峰者云云彼固未之聞也  
胡公策曰直與海雖順逆不同其勢固唇齒也直旣  
悔悟海獨不可以大義說之乎不然彼貪人也誘之  
以利或可徇其心聞桐鄉城小而堅緩之數十日則  
永保戍兵至固可破之矣於是疾走人諭海峰因厚  
遺謀者陰過海所曰直已遣子欵定海關

朝廷固且赦之矣若獨無意乎新總督威名非曩時比且  
仰體

朝廷德意推心置人腹若不棄此時解甲自謝他日必爲  
虜矣海頗然其計於是亦遣酋自謝約罷圍去因以

要公稍出中國貨物遺他倭酋而疏釋其罪公佯諾  
輒以銀牌綺幣厚遺來謝酋而陰令營中盛兵容私  
謀者故縱酋瞰之酋既德公遺又內怖公之兵威也  
歸以報海明日復遣他酋來謝公視之如初凡數復  
海於是始歸心於公願爲公死之矣然陳東獨心切  
疑海私公遺猶鞅鞅未之從也海間遣首次桐鄉城  
下私城上兵曰某已聽總督胡公約解去矣城東門  
故柘林賊陳東黨也鴛悍不吾從若當謹備之是夕  
海果道德而西且乞他兵於公以夾擊東胡公猶心  
訝未之許而東獨盛爲樓櫓撞竿以撞城而桐鄉令  
金燕者疆幹吏也城中一切兵仗火藥諸已繕備提  
督阮公復躬厲矢石徇城上人下令散千金募敢死

之士督戰益亟所殺傷賊亦數十人方撞竿自樓櫓  
中躍而撞城城幾壞一男子爲縉索圍撞竿所擊故  
窟處竿至卽縉挽以上斬之又募冶者煮鐵汁灌城  
下酋城下酋不敢逼東既無何聞海等解去道遠勢  
且孤亦相與稍稍引去圍始解而提督阮公出矣時  
五月二十三日也方阮公困桐鄉時固日夜望總督  
胡公援兵之至而胡公亦重念東南之安危身之禍  
福與阮公相旦暮情固急業已遣兵備劉公督同留  
守王倫宣撫田九霄勒兵自嘉興入壁斗門分守汪  
公督同知縣張冕勒兵自湖州入壁烏鎮叅將丁僅  
勒兵自海鹽入壁王店指揮樂墳督同千戶羅天與  
勒兵自崇德入壁石門又令崇德令崔近思收河朔

之散卒入城爲聲援兵四面環賊遠者二三十里近者十餘里而陣然各以狃皂林之敗逡巡惶怖不敢逼而公業遣諜羈說賊亦日夜望永保戍兵之至以決一戰也計無可奈何而胡公與阮公兩人者爲同年故深相結者及援兵不合阮公自圍中頗急於是兩相猜而他謗者與爲飛語撼兩公者盈道路矣當是時

朝廷聞東南之寇卽日出尚書趙公督山東河朔諸兵援之又兩公所私相猜者語頗聞趙公趙公亦故與兩公者爲肺腑交所嘗兩推轂中朝以填東南者念兩公卒有卻則東南之事牴牾不可圖於是日夜引兵而南至揚州則阮公業已出桐鄉圍東渡錢塘徇會

稽諸下邑擊他賊胡公亦聞尚書趙公之至且戰且南淮揚毘陵之間無足慮海爲巨孽間雖狃而內附中固不可測而上海之賊萬餘人由吳淞江西引方急迺日遣諜者啗海以金帛而說之東出海上擊他賊海亦果收諸倭酋出乍浦道平湖時諜報吳淞江之賊已鼓行涉嘉善界欲西合海公念海萬一卒他變兩相合柰何因策海始已焚舟爲深入今不得舟必急於是遣諜調海謂海旣內附何不如故約勒兵擊吳淞江賊且募奪其輜掠舟以歸海果然其計卽日引諸酋逆之朱涇道上斬首若干級餘賊遂夜走以故海不及募奪其舟而還及他酋脫而出海也公又別遣總兵俞大猷伏飛艦海上遮擊之溺且盡於



是海旣德公不敢背又聞吳淞江賊之出爲海兵所  
遮擊益內怖日輸款於公遂輦故所戴飛魚冠及他  
堅甲名劍數十種並以輸公而間遣其弟洪入質於  
公公固佯納之公又謀間海麾下獨書記葉麻爲長  
酋其爲人頗黠而悍近與海爭一女子有微卻非用  
間急縛之則無以死彼之內附之心於是遣謀就海  
帳中諷海縛葉麻以出葉麻出而諸酋中故隸葉麻  
部曲者稍稍怨且懼矣怨且懼恐生他釁則又以他  
罪縛 幾百餘人公又策陳東於諸部曲中與葉麻  
聲相倚頃以桐鄉之役兩睚眦者也數遣謀持簪珥  
璣翠遺海兩侍女令兩侍女日夜說海并縛東海間  
諾而陳東者薩摩王弟故帳下書記酋海固未之能  
也於是出葉麻囚中令其詐爲書於東反兵賊殺海  
其書故不以遺東陰泄之於海激怒之使并縛東海  
讀其書涕雙下益德公之不忍爲東所賊殺之也日  
夜謀縛東以報公居無何尚書趙公移兵渡江來所  
過州縣數舉兵向賊賊輒敗走俘斬若干級兵威大  
布當是時公已知海之甘心於東不忍疾擊海疾擊  
之兩人迫而深相結則東南之事未易圖而尚書趙  
公之至也私約公共部署兵擊海日急且召公故所  
遣謀面詰之曰若爲我諭海海連兵以來罪不容死  
非縛陳東及斬千餘級以獻恐無以謝

朝廷若能則吾當同督府諸公疏釋之不然若且糞粉矣  
是時阮公亦至於海益怖出所故掠中國貨物千

餘金賂王第詐請東代署書記海因夜得東即縛以  
故約復於胡公葉麻與陳東相繼縛而諸酋長洶洶  
內亂矣是時諸酋長既疑且怨海無鬪心故其氣日  
窘海亦自度縱令反故島當亦必爲諸酋長所賊殺  
故爲內附日固而公與趙公簿責海益急海既急因  
念欲掠舟出海恐爲海上兵所劫欲列壘拒官兵又  
業已內附不忍背且陳東黨固日夜襲殺之也公策  
曰彼既亂吾可乘之矣因遣謀私海曰我固欲寬若  
趙尚書翁以若罪孽大何不聽我艦數十艘海上若  
且誘之逐海上艘令俘斬千餘級以謝趙公而若因  
得以自完乎海不得已且疑且諾因約兵備副使劉  
公引兵伏乍浦城中而某日時其當引衆出海岸去

乍浦城半里而陣佯令衆酋逐海上艘某手旗麾之  
城中官兵卽舉燧爲號從城中出亟擊勿失諸官兵  
卒如故約乘之諸倭酋逐海上艘如蟻不及還兵鬪  
於是諸官兵得乘勝蹂而前不傷一卒所俘斬數十  
百人沒海者無筭於是海自以數有功於

朝廷願與部下諸酋長入款且庭謁胡公與尚書趙公提  
督阮公及巡按趙公並許之謀往復期以八月初二  
日然海猶恐間設甲士劫之先期一日卒擁酋數百  
人胄而陣平湖城外自帥酋長百餘人胄而入平湖  
城中以求四公者計不許恐他變遂許海與諸酋長  
北嚮面四公按次稽首呼天星爺死罪死罪海欲再  
爲款胡公而未之識因碩謀謀目示之海復面胡公

稽首呼天星爺死罪死罪胡公亦下堂手摩海頂謂之曰若苦東南久矣今既內附

朝廷且赦若慎勿再爲孽海復稽首呼天星爺死罪死罪於是四公厚犒遺之而出是日城中人無不洒然色變者海既出諸公者固已忿恚海之列款猶胃而入屬疆脅無禮又不及如謀故所期月日而先日卒至也其習新黠若此於是闔謀不勒兵誅之他日必爲患計部下尚千餘人猛鷲難卽破永保兵猶迤邐遠道未至也於是佯令海自擇便地居之海果自擇便地得沈家庄卽僦沈家庄與居之是爲八月八日當是時衆復喧然譁諸公輩何不撲滅海不然且縱之出海上令自解去願豢虎以自禍也不知諸公者固

有待於是胡公與尚書趙公提督阮公私自部署

又日夜遣使趣永保兵來會兵未集恐海驚禍日

腋間胡公因日遣諜調海且啗海如曩時公因謀

請於趙公曰吾聞善兵者乖其所之海與陳東黨

已深仇今合而兩附者迫故耳聞沈家庄故東西

處而中縮河爲塹何不說海以西沈家庄居陳東黨

而自擇東沈家庄以居部下酋乎謀以諭海海果如


其言頃之永保兵至會海輸二百金於公市酒米公

復與趙公謀以藥毒其中而歸之又令陳東詐爲書

夜遺其黨曰海已約官兵夾剿汝輩矣陳東黨果疑

而夜伏邏卒東沈家庄道上瞰之適海皇急因令酋

竊兩侍女出道上而急則因間道走幕府以自托邏



原件短缺

P22

卒職知之歸以報於陳東黨陳東黨聞之大驚卽勒兵募兩侍女過海所罵曰吾死若俱死耳遂私相稍而鬪海中稍衆大亂明日官兵四面合墻立而進保靖兵先當之稍却河朔兵乘之又却俄而胡公擐甲厲聲叱永保兵左右列大呼而入瞰壘下擊會風烈公麾衆束千餘炬人各持炬縱火焚之海窘甚遂沉河死甫食頃人人驚而攫千餘首蒐斬殆盡矣中所故飲毒首虜黑色者凡三百餘人於是永保兵俘兩侍女而前問海何在兩侍女者王姓一名翠翹一名綠姝故歌伎也兩侍女泣而指海所自沉河處永保兵遂蹈河斬海級以歸

副史茅坤撰

### 龕山之捷

嘉靖三十五年十一月

龕山之賊自溫州登岸蔓延於會稽經歷文某與戰于苦竹嶺副使孫宏軾併軍門所調奇兵與戰于析開嶺于翁家村叅將盧鏗與戰于斤嶺于梁衝賊乃敗走龔家畝百官渡過曹娥江順流而西狡黠善鬪噬齧孔棘初總督都御史胡公方在浙西勦川沙之賊移檄諸將竟未有能殄之者至是親提大兵至欲斬不用命者以殉於是僉事李如桂王詢指揮楊永昌知事何常明典史吳成器等兵併力追擊於瓜山戰三界戰毋婆嶺朱家淩賊遁蕭山之丁村杭湖至陳家灣雖多所殺傷而凶醜愈熾公至擇地形壁龕山之巔分諸將信地皆露宿以待時叅將盧鏗戰還公促明日再戰鏗曰士疲矣休養數日乃可公佯許諾

而密召親兵謂曰若曹養久未立戰功今賊將滅而諸將首鼠不進萬一賊得脫此經渡錢塘江奈何今日正若曹立功之會能乘其不意而襲之賊可盡也衆皆踴躍請効死已乃激令成器統之以進不數里遇賊死戰無不一當十賊遂大敗循海而走登匿山坡堡內我兵四面奮擊不得已登屋擲瓦礫下瓦盡繼之以槍槍盡投刀刀盡乃下死守我兵攻堡破之悉斬首以獻時日且暝公喜謂諸將曰此賊流突千里轉戰無慮數十無能櫻其鋒者今一鼓蕩平真

朝廷天威也命取賊心啖之選淨獍首級廿餘顆置案上每顆爲飲一觥左右皆失色而公談笑自若也達旦諸營方知破賊相率入賀公謂鏗曰再一二日何如鏗大欽服

乃完師而歸時乙卯冬仲既望也

山陰縣學生員徐渭撰

金塘之捷

嘉靖三十五年

辛五郎者宿寇徐海之偏裨也與陳東葉宗滿麻葉輩同  
巢柘林攻乍浦圍桐鄉毒螫吳諸州郡其志欲吞全浙窺  
留都勢甚猛也總督胡公欲滅之忌海與其黨既而海受  
餌爲我用擒其所惡陳東麻葉輩而遣其所懼以歸倭島  
五郎在焉公密令總兵俞大猷等分布海洋要衝截殺諸  
寇而五郎則責之盧鏜鏜接密諭時方對諸客食忽命治  
艦之金塘山客相顧莫知所謂鏜自乘福船令子相督率  
哨舡為前驅次日至金塘瞭見北洋有大舟揚帆而南令  
哨船四散潛泊少選大船艤金塘之麓賊皆登憇鏜知其  
爲五郎也令哨船叢射之繼以銃炮賊以手且搖且招搖  
者示勿攻擊招者示有所言也相乃颺言曰欲打話湏去

爾兵器賊拍掌示無而呼一董

一董者一家之義乃倭語也

有華人從

寇者曰吾乃胡總督爺招安放回者也相問曰有牌驗乎  
曰有鏜招衆賊至舟傍慰籍之謂五郎曰汝既為軍門所  
遣豈可慢乎請至縣款洽而津送之遂延五郎同舟餘派  
哨船分載每載不過三四人多則不能容也五郎辭鏜厚  
加體貌五郎不疑宴至深夜鏜坐福船上層將臺侍者引  
雙燈上桅俄而哨船蜩聚鏜問之曰如何相對曰是了五  
郎大驚請下哨船與衆夷同宿鏜曰諾令左右送之穴梯  
而下至蓬戶外望維海而已五郎悟欲赴水死左右不許  
曰卧塌在地平下五郎度不能免浩歎就卧相縛之翌日  
入定海關乃知賊徒俱已芟盡即前夜起雙燈時也是了  
者乃復命也群賊死時皆不知軍門之謀僉訝哨兵敢行

候殺五郎亦自以偶遇盧鏜被執不知其出軍門也嗚呼  
神哉後獻俘告

廟

天子賜璽書獎公天下無不稱快云

崑山進士王宇撰



擒獲王直

王直者歙人也少落魄有任俠氣及壯多智畧善施與以故人宗信之一時惡少若葉宗滿徐惟學謝和方廷助等皆樂與之遊間嘗相與謀曰中國法度森嚴動輒觸禁孰與海外乎逍遙哉直因問其母汪媪曰生兒時有異兆否汪媪曰生汝之夜夢大星入懷傍有莪冠者詫曰此弧矢星也已而大雪草木皆冰直獨心喜曰天星入懷非凡胎草木冰者兵象也天將命我以武勝乎于是遂起邪謀嘉靖十九年時海禁尚弛直與葉宗滿等之廣東造巨艦將帶硝黃絲綿等違禁物抵日本暹羅西洋等國往來互市者五六年致富不貲夷人大信服之稱爲五峯船主則又招聚亡命若徐海陳東葉明

等爲之將領領貲勾引倭奴門多郎次郎四助四郎等爲之部落又有從子王汝賢義子王激爲之腹心會五島夷爲亂直有宿憾于夷欲藉手以報及以威懾諸夷乃請于海防將官而剿之無孑遺者而聲言宣力

本朝以要重賞將官餽米百石直以爲薄大詎投之海中從此怨中國頻入內地侵盜直又嘗以扁舟泊列表叅將俞大猷驅舟師數千圍之直以火箭突圍去怨中國益深且眇官軍易與也乃更造巨艦聯舫方一百二十步容二千人木爲城爲樓櫓四門其上可馳馬往來據居薩摩洲之松浦津僭號曰京自稱曰徽王部署官屬咸有名號控制要害而三十六島之夷皆其指使時時遣夷漢兵十餘道流劫濱海郡縣延袤數千里咸遭荼

毒而福清黃巖昌國臨山崇德桐鄉諸城皆爲攻墮焚燔廬舍擄掠女子財帛以鉅萬計吏民死鋒鏑填溝壑者亦且數十萬計比年如是官軍莫敢嬰其鋒但爲計狡譎每殘破處必詭云某島夷所爲也故東南雖知王直之叛而不知受禍之慘皆由直者獨總督胡公前按浙時見賊進退縱橫皆按兵法知必有坐遣者且賊酋來者皆直部落也而不聞直來其爲坐遣無疑先是間使徽州收其母妻及子于金華府獄中至是出之豐衣食潔第宅奉之以爲餌而疏請以移諭日本禁戢部夷爲名其實注意伺察直也

上從之乃遣生員蔣洲陳可願充正副使以行公以密計授洲等曰王直越在海外難與角勝于舟楫之間要須

誘而出之使虎失負嶼之勢乃可成擒耳又曰王直南  
面稱孤身不履戰陣而時遣褊裨雜種侵軼我邊圉是  
直常操其逸而以勞疲中國也要湏宣布

皇靈以携其黨使窮髮皆知向化則賊之勢自不能容然  
後道之滅賊立功以保親屬此上策也洲等領計敬諾  
而行居無何倭酋董二被擒訊道直事甚悉與公所料  
不爽毫髮中外始曉然知狀于是

上以公灼見禍本降

璽書褒勞而闔外之事一以委公公得

旨規羅益密御史金淵陶承學交章請立賞格有能主設  
竒謀生擒王直者封伯予萬金部議從之

詔曰可嘉靖三十四年十一月洲等至五島遇王激道以  
移諭事激曰無為見國王也此間有微王者島夷所宗  
令渠傳諭足矣見國王無益也明日直出客館見洲等  
推髻左衽旌旗服色擬王者左右簇擁洲等心動坐論  
鄉曲設酒食相對情款方洽洲等曰總督公遣洲等敬  
勞足下風波無恙直避席曰直海介適臣總督公不曳  
尺纏牽而鞠之而遠勞訊使死罪死罪洲等曰總督公  
言足下稱雄海曲志亦偉矣而公為盜賊之行何也直  
曰總督公之聽誤矣直為

國家驅盜非為盜者也洲等曰是何言與足下招聚亡命  
糾合倭夷殺人剽貨坐分鹵獲而為之辭曰我非為盜  
者是何異于昏夜操畧以臨人之池執之則曰我非盜  
魚者為君護魚者也雖三尺童子知其必不然矣直語

塞洲等曰總督公統領官軍十萬益以鎮溪麻寮大刺  
土兵數萬艤艦雲屯戈矛雨注水陸戒嚴號令齊一而  
欲以區區小島與之抗衡是何異于騁螳臂以當車轍  
也又曰總督公推心置腹任人不疑拔足下壽母令妻  
于獄中館穀甚厚則公之心事可知矣何不乘機立功  
以自贖保全妻孥此轉禍為福之上策也直默然而罷  
乃挾洲等巡數小島而還而從此風聞外夷隨其願指  
者頗少變而叛賈倚直為淵藪者多有離心直始不安  
于彼矣初直聞母妻為戮心甚忿欲犯金華及聞洲等  
言無恙又竊喜于是始有渡海之謀日夜集所親信者  
計之謝和等曰今日之舉未可冒昧以往也當遣我至  
親為彼所素信者先往宣力以堅其心待彼不疑然後  
全師繼進始可以逞直笑曰妙筭也遂托宣諭別國為  
名留蔣洲在島令葉宗滿王汝賢王激同陳可願回至  
寧波詰之皆云宣諭未至時徐海陳東已擁薩摩洲夷  
過洋入寇矣今王直歸順先遣葉宗滿等投赴效力成  
功之後他無所望惟願

進貢開市而已公得報已揣知其計姑從所請疏

上許之公喜曰虜在掌中矣先是海中倭寇敗沒有零寇  
百餘據舟山為亂公遣葉宗滿等協助官軍剿之盡殲  
焉公疏

上功次犒賞有差王激笑曰此何足賞若吾父至當取金  
印如斗大嘉靖三十五年三月徐海等果擁眾十餘萬  
寇松江嘉興諸郡甚急聲言欲下杭城取金陵勢張甚

公乃謀之王激等以觀其意激等初欲小試慙慙故甘心于舟山之寇至于徐海等正其所倚以圖大事者且欲速直來共濟乃辭曰是非吾所能辦須吾父來乃可耳遂留夏正童華邵岳輔王汝賢在軍門自以招直爲名與葉宗滿開洋去是年徐海等以次就擒事見徐海傳公恐形跡彰露委心留用王汝賢等撫摩若親子然葉宗滿兄弟並加禮遇時時對將吏士民曰直非反賊顧崛強不一見我見我當有處也直聞公意指謂公誠朴可欺欲乘機以全親屬且未知徐海等敗沒以爲縱不知所料亦可與之應援得志而去遂決策渡海先遣蔣洲次遣王激葉宗滿等率銃卒千餘執無印表文詐稱豐洲王入

貢先泊岑港據形勝分布已定直乃與謝和等慷慨登舟醜酒誓衆曰俞大猷吾嘗破之列表泊岸時須謹備之公當直未至時已度其有隙豫調俞大猷于金山而以總兵盧鏜代之盧鏜者舊與王激等從事舟山同飲食撫循倭夷備至直坦然不疑惟日聚羣倭礪兵刃伐竹木爲開市計且索毋妻子弟求官封時公計已定仍姑列狀

上請以安其心

上已知直爲釜魚智力俱非胡公敵乃顯

詔王直旣稱投順却挾倭回來以市買爲詞胡宗憲可相機設謀擒剿不許疎虞致墮賊計公奉

詔秘而不宣夜馳至寧波城圖方畧密調叅將戚繼光張

四維等督諸律將埋伏數匝水陸要害星羅碁列魚鳥  
莫度乃以夏正等爲死間諭直曰汝欲保全家屬開市  
求官可以不降而得之乎帶甲陳兵而稱降又誰信汝  
汝有大兵于此卽往見軍門敢留汝邪况死生有命當  
死戰亦死降亦死等死耳死戰不若死降降且萬有一  
生焉直拂然不悅而公與其所親信王激葉宗滿先遣  
來見者連床卧因佯露諸將請戰書十餘篇于几案王  
激等竊視驚怖夜半公作醉夢中語云吾欲活汝故禁  
不進兵汝不來休怨我也含糊其辭吐蒲床王激等漏  
之于直直始疑之又使其子澄嚙指血寓直書云軍門  
數年恩養我輩惟願汝一見使軍門有辭于

朝廷卽許眷屬相聚汝來軍門決不留汝藉令不來能保

必勝乎空害一家人耳又使邵岳董華等往來游說直  
猶豫未決公以直執戀岑港已踰五旬察其心神終屬  
觀望乃開關揚帆示欲進兵直探知四面兵威甚盛終  
無脫計且知徐海等敗沒孤立無援因嘆曰昔漢高祖  
見項羽鴻門當王者不死縱胡公誘我其柰我何乃曰  
部兵無統欲得王激攝之公知海上諸賊惟直多智習  
兵久雄異域得人心爲難制其餘皆鼠子輩毋足慮諸  
將亦云以犬易虎不可失也遂遣激往直乃桀然詣軍  
門時嘉靖三十六年十一月也公執之付按察司獄乃  
集三司諸大夫叅議曰王直始以射利之心違明禁而  
下海繼忘中華之義入番國以爲奸勾引倭夷比年攻  
劫海宇震動東南繹騷雖稱悔禍以來歸仍欲挾倭而

求市上有干乎

國禁下貽毒于生靈惡貫滔天神人共怒問擬斬罪猶有餘辜公具疏

上請得

旨斬直于市梟示海濱妻子給功臣之家為奴王汝賢葉宗滿俱從末減邊遠充軍王激出洋為颶風所覆其餘從賊魚散鳥驚奔聚山谷公親督官兵掃除黨與皆絕  
嘉靖二十九年二月兵部始以封賞之議

上請

詔曰大憝既除海氛已靖部議報謝徐徐何也胡宗憲可太子太保都察院左都御史兼兵部左侍郎蔭一子錦衣衛副千戶其餘有功者陞賞有差

舟山之捷

嘉靖二十七年二月

嘉靖戊午春二月總督侍郎胡公某擒獲元兇王直其餘黨泊舟山之岑港倚險列柵勢甚猖獗公命把總任錦指揮甘述宗等進泊江口之南都指揮李涇指揮張天杰等泊港口之北總兵俞大猷等以福船并叭喇鳥入槳串網船往來策應指揮周官土官彭志顯領大刺土兵由中路小河嶺入指揮楊伯喬唐瑩土官張領鎮溪麻寮兵由右路碇礮入參將戚繼光率部兵由左路小嶺入而指揮楊永昌盧錡鮑尚瑾方昇通判吳成器等分道策應參政王詢劉燾副使陳元珂則監督之約期水陸並進直抵賊巢時都指揮戴冲霄先用火攻殺傷頗多公許全捷俱在首功禁取級以妨前進我兵蹂屍而戰賊大敗奔舟忽港

側砲聲大震復擁衆登陸抄後死戰我兵後哨稍却前鋒  
四擊橫衝賊乃斂營固守公以夷僧德陽稱貢而來賊脅  
爲聲援可計而離也乃潛縱之令成器遣諜持信票數百  
入巢散其脅從由是賊勢日孤爲守益堅公又檄諸將曰  
賊所以負固死鬪者蓋春汛已及計有新倭可爲應援若  
哨擊稍踈必流突與合矣此非小利害也其督舟師預爲  
哨探之計無何果有倭船泊普陀小道頭叅將張四維推  
官查光述等督兵且戰且逐至烏沙門外洋賊遂潰敗俘  
斬四十餘級賊走登烏沙懸山卽朱家尖山也公策此賊  
與岑港之寇相距不遠陸路必由碇礮水路必由嚮礁門  
乃檄諸將設伏以待已而賊果由二處奔沈家門與岑港  
合踪公不得已親蒞定海分遣將領各與信地福船由岑

港南口廣船由北口宣撫田世爵都指揮何本源等兵由  
馬巖至張礮一由 寺嶺至三官堂一由小嶺至聚水  
塘進而以元珂四維往來監督又遣奇兵由天童逕搗賊  
船仍近巢半里許列一老營以肅居中調度叅政胡堯臣  
防守所城督發糧餉尅期大舉時賊依山阻水列柵自衛  
火器頗多我兵陷陣先登者間多被害公復檄諸將從中  
逼壘而陣且示以哨伏應援之規更番迭戰以耗其火藥  
折其銳氣又令夷僧輩招之私語賊遂互相猜疑至持刀  
自擊我兵乘隙進攻賊衆大亂夜分縱火焚其舟死者無  
筭余各奔巢我兵躡之斬柵而入斬馘百餘級復奔柯梅  
嶺我兵追之火其巢廠賊勢窘甚遁出浦口四維與指揮  
朱尚禮等舟師追至俞山外洋見賊連艘而行遂以兵船



潛伏山下而以小艇嘗之賊果逐利來追伏兵大起夾擊之犁沉四舟擒其渠魁汪印山陳禮等斬首九十餘級溺死者不計王直之黨至是盡矣是捷也五哨之布公有成筭而大猷等參錯不進沈家門合踪公料敵如神而諸將不先事追擊至崖定海之設非公淵度圓機小挫不折能因敗爲勝且柰何哉嗚呼於是見公之心獨苦矣

俞獻可撰

### 淮揚之捷

江北之有倭患自嘉靖乙卯始淮揚故多大賈富戶賊至屬厭以去自是歲以爲常丁巳夏賊千餘深入天長泗州

祖宗陵寢幾至震驚

廷議特設提督都御史而以豐城

李公遂至卽立什伍之法定援應之規練鄉兵嚴保甲

設將官築城垣造戰艦爲水陸戰守之計賊知有備舡

泊拙港者不敢登岸而去江北頓以無事己未賊萬衆

連艘分道並入中外震恐時四月一日也公閱兵通州

計賊若從海門西亭趨如臯則通州在賊外乃兼程趨

通泰州而以副使劉景韶遊擊丘陞駐兵如臯以扼要

害檄各路兵進黃橋海安等處援應已而賊至益多我

兵迎戰挫其前鋒賊果出西亭知如臯有備遂由通州東趨白蒲鎮公計賊深入利在速戰戒海防等兵據丁堰東北堅持不出時東南風急我兵不便迎擊公籲天以祭風卽回連三日乃擐甲誓師斬不用命者人皆踊躍以進又計賊過如臯必由黃橋泰興犯瓜儀則糧運阻梗留都搖動若驅之富安以北沿海東出無能爲矣乃身當泰州之衝而以黃橋西路責景韶等賊求戰不得進據丁堰丘陞從河北縱火焚之邊兵衝入賊營毛葫蘆兵復從南出首尾夾擊賊退屯二十里連日接戰斬其金盃賊首一人日且晡我兵少卻賊進至如臯公計其必奔揚儀趣與海防遊擊兵從間道越過賊前徑趨秦州若以爲西路之防其實於秦州待敵也執賊黨潛入城爲內應者賊未至三十里輒從富安沿海東出我兵追躡賊後公戒毋輕戰晝則逼令不得久駐夜則退屯以防衝突公親提大衆馳淮安馬邏之間約與諸將夾擊於廟灣賊覘知之分其衆一由西亭一由白蒲丁堰以牽制我師公令景韶陞專擊二賊而身赴淮安以當大敵丁堰流賊至曹家堡與我兵遇逐北至潘庄全夥覆沒公至淮安而總督侍郎胡公與視軍通政唐公順之亦提青沂兵至相與合勢公乃部分中軍馬兵爲前驅曹克新兵爲中哨青州邢鎮兵爲左哨沂州何本源兵爲右哨中軍倪祿梅三錫合曹沂公一等兵爲後繼列陣於姚家蕩以待初賊計我兵綴於丁堰之賊急走淮安欲掩其無備比至見兵勢甚盛相顧驚愕盡

銳衝我左哨公揮兵四面圍擊俘斬八百有奇焚溺死者不計賊不得已奔守廟灣于時西亭之賊夜走海安諸將不能禦公以廟灣賊垂盡恐揚儀有失乃親往揚州而視師唐公援兵亦至時賊已奔張庄因益兵赴接海安而與唐公俱還廟灣督諸將搗巢令軍中多具畚鍤先填溝港毀民舍之傍賊巢者我兵分番進攻斬級一百五十有奇賊乘風雨夜遁而西亭亦以全捷來告無何閩中之賊止近百然沿海轉掠來去無定踪不可力取爲颶風飄至者公令守備楊縉擊滅之斬其酋長八大王孟得山崇明三沙之寇潰圍而來時海門狼山如臯泰州揚州俱潛有備賊由七星港焚舟登岸深入拏茶塲揚縉陳忠等兵尾擊之自是連戰皆捷斬級三百有奇賊乃竟走海塗而公已宿戒沿海無得泊舟以是賊不得去復敗之劉庄會唐公遣副總兵劉顯適至公益以親兵使與賊戰賊連敗走竹堰仍沿海北遁我兵追及之於七竈斬級九十有四又及之茅花墩斬級一百七十賊奔唐家滌僻遠無兵復登岸掠食而公故所練鄉兵追兵競逐之斬級一百四十有奇賊遂盡絕矣是役也自夏及秋僅四閱月前後斬戮焚獲不可勝紀其成功之偉何如耶予嘗窺遼陽聞永樂間都督劉公江鎮遼時有倭患望海蝸之戰斬級千餘生擒四百封廣寧伯至今海上之烈人猶頌之公以文臣特起其所建立卓卓如此直足以宣揚

朝廷之威發舒華夏之氣匪直淮揚之利而已夫賊之始

至也非公決戰通泰則爪儀維揚必受荼毒而運餉不  
免焚掠賊之東奔也非公出賊不意收功姚蕩則淮城  
多不可守而鳳泗不免震驚三沙之賊北渡也非公預  
有成筭厲兵急戰則以彼勝勢乘我困疲又適我地災  
饑幸亂樂禍之人內應必衆事變未可測也記曰以勞  
定國則祀之能禦大災則祀之能捍大患則祀之公於  
三者實兼有焉予不文聊述其所見之畧

兵部侍郎蔣應  
奎撰文節畧

### 寧台溫之捷

自倭奴入寇東南惟浙為最甚浙受禍惟寧台溫為最  
甚而我總督軍門少保兵部尚書胡公為御史時自王  
江涇捷後我兵始有生氣至今官凡五轉而大捷者十  
有三徐海王直擒而禍本去矣戊午冬舟山既捷而我  
兵告罷戰者二年我總督公安不忘危日暮東鄉望思  
斫扶桑而湮之海嘗曰余不恃倭之不來恃吾所以待  
倭者來耳益繕甲治艦峙糗選將練士惟謹水陸分地  
刻期防汛惟謹示戰守機宜約束惟謹策畫萬全兵氣  
振厲人人無不樂為死者辛酉夏四月忽並海郡報賊  
艘從外洋來者日數至而合象山奉化寧海瑞安樂清  
諸縣中中大嵩霽霽挑渚新河楚門健跳隘頑諸所

報舡不下數百艘賊不下一二萬人而所登犯地散至數十處人情洶洶檄書人馬交錯于道公顧從容燕笑自若徐罵曰桀黠奴投死耳撲滅之在旦夕也乃籌筆授方畧密封付使者馳去各海道兵備分守巡總兵叅將諸官而遣遊擊將軍王應岐何本源即日督發大兵二營六千人并調叅將呂圻部兵先往同所在官軍擊之公乃卜日社禡載燾臨止厥地至則親履戎行不逾二旬而捷凡九至所向靡不摧破震赫風霆電掃影滅而白水洋戰為最奇云先是四月十九日倭船一艘望小展至馬畧沙坡公所督部兵及守備盧相等兵擊殺舟師賊遂奔岸時帶管海道副使王春澤調守舟山把總章延廩率陸兵至即伏為應水兵從下急追伏者起夾擊之賊大敗溺死者無算斬首二十五我兵死者三人越二日洑港中大草撇船一艘來公所督部把總周栗統林仕貴及盧相等船與賊三十餘戰用發熾佛郎機諸火具斃之弱者無算斬首五十而兩頭洞賊一艘把總童華斃之斬首若干而犯象山者乃王海道奉軍門方畧會同總兵盧鏗調度分守叅議唐愛協計與前所督發二遊擊大兵呂圻部兵進勦之其犯大嵩者我兵逐出橫山各水哨又伏候外海故遠巡海口不出五月一日夜燒船奔鮎鯨乃王海道會同盧總兵何遊擊兵分南路由奉化入象山而海道兵由大嵩入裘村亦趨象山前賊適入我兵中路二日賊出岳林庄盧總兵何遊擊鼓行前趨相去二十里各遣銳兵趨合呂叅

將王遊擊兵前後繼發三日賊至裘村分三陣迎敵海道把總胡良瑤李超等兵先至遂陷陣先登各銳兵殊死戰數合賊大潰斬首百五十七陣亡者三人八日梅山港賊三艘計二百人突入天童小白東吳呂圻追至東湖哨兵湯時茂等斬賊首一人遂夜遁石橋湖頭橫溪奔入山徑走海道即遣中軍指揮艾升由小路徑出賊前呂圻追尾賊後至白杜兵合賊屯余家各兵用火攻之燒死者不計潰出朱家店者各兵夾擊之章延廩兵生擒二人斬首五十六呂圻兵斬首二十一陣亡者各營共三人至暮收兵一賊負傷竄山中千總汪廉斬之苦勦嶺下寧遂平先是海道諸兵前副使譚綸寔訓練之極精銳而譚以憂去舍無何會王副使來寔能守

譚成法較若畫一而成功若此非耶前四月十九日又烏嘴船十六艘由象山從奉化西鳳登岸夜突至寧海一都團前是時松門海門俱無警乃台金嚴兵備僉事唐堯臣叅將戚繼先將原發松海二關扼守陸兵三枝撤回繼光親督二枝趨寧海留一枝劄海門中地備警分發中軍游擊兵協守新河會行把總任錦兵船速出寧海外洋伏擊又行寧波海道總兵各發官兵水陸會勦二十二日賊知戚叅將至寧海遂乘虛以大船五艘竄入桃渚大域港裡浦登岸計五百人有奇是日又三艘入新河週洋港登岸次日又五艘亦從週洋港登岸與前賊合共計五六百人二十五日又七艘入健跳折頭登岸計二千人有奇戚叅將日犯桃渚健跳者勢尚

八  
卷之九  
四  
緩週洋逼近新河所城賊又前後繼至宜急擊之而會  
軍門批唐僉事申列賊狀有云賊雖分侵不可墮其計  
中輒便分兵應策當併力合勢先討其重大者然後以  
次剷除乃僉事與戚繼光奉令惟謹即部署諸兵疾趨  
新河擊之又令黃太二縣號召程梁等姓鄉兵助戰賊  
懼夜駕五船遁去餘屯城外鮑主簿家二十六日擁衆  
薄城下攻城唐僉事與戚繼光原授軍令相與協謀調  
度曲慮廣畫以樓船劉意張元動胡守仁等分立陳列  
密授方畧使竒正相參各以縣尉武生等監督之而給  
餉抹運器械斷要害固封守審堅瑕援桴策應者各有  
屬既定乃申明用命不用命誅賞令甚肅驅死士衝鋒  
而先用鳥嘴與賊對擊千百搃哨隊長蔣瑞葵實等奮

勇先登力戰良久賊遂潰亂傷甚奔原巢死傷者六  
十餘人 各哨共得首級三十顆是夜二更賊見哨口  
太平走旦日劉意樓楠兵追至溫嶺大麥坑太平知縣  
徐鉞亦督鄉兵會勦共斬自二十二餘賊奔田舍中者  
燒死之突出火者遁温州則犯桃渚裡浦賊是日亦遁  
至台州府城外花街戚叅將即自桐岩嶺馳抵城下時  
各兵尚未炊以大義諭之各兵勇氣百倍無不爭先躍  
起乃鼓行而前以丁邦彥爲前鋒陳大成爲右哨陳濠  
胡大受爲中哨趙記孫廷賢爲左右翼各置監督竒正  
衝伏各有指犄角聲援各有厲乃齊陣而前至花街約  
二里賊以一字陣迎敵丁邦彥部下列銳分番銳殪數  
賊各兵乘勢擁殺賊乃分右哨敵我左哨丁邦彥反擊

其左賊又分左哨敵我右哨陳大成反擊其左於是旗  
鼓盡變竒伏俱出賊乃敗北奔陳大成兵追至瓜陵江  
下賊奔水死者二百有竒而前陣中斬首三十九丁那  
彥兵追至新橋五戰五勝共斬首六十一生擒倭首一  
人二十九日胡震于邳山下犁沉大倭舡一艘死者計  
百餘人生擒倭酋一人斬首八三十日前登拆頭大夥  
賊二千有竒自燒舡南突府城賊繼光部兵已分留守  
新河隘頑可戰者千五百人賊與我寡繼光憂之又恐  
流犯內地勢當速滅乃與唐會事厚犒之懸千金為衝  
鋒者賞光又盡出筭中銀酒具散之又監軍知縣趙大  
河登壇誓衆申諭大義語棘棘動耳目氣烈振山嶽  
兵乃踴躍受令靡不一當百五月一日

大田設伏待賊賊至亦設伏待我合軍不戰越二日  
賊徑出大石往僊居賊繼光曰賊出中渡由裏路至白  
水洋七十里我兵由官路至白水洋五十里兵法云先  
處戰地而待敵者伏且以寡禦衆非謀不克而臨敵交  
鋒我少彼多必兵心激發乃勝遂策馬鼓行四十里至  
上風嶺屯止多令探者出賊前後視其向往知狀即率  
兵上嶺伏五日前鋒兵出頗早光乃下令令人各砍松  
枝一樹執而坐賊望之為林不介意行列二十里衣甲  
旗幟甚盛我兵對山瞭之俟其行過半乃仆松呐喊齊  
出賊驚以三四百人作一字陣衝來我兵分為一頭兩  
翼一尾陣以太學生蔡汝蘭左蒸監督而陳惟成陳法  
陳蚤楊文通等俱趙大河監督以鴛鴦陣衝鋒擁殺夙



受令不許取首級疾若風雨有前無退賊遂敗遁上一  
小山然猶怒鬪不已丁邦彥兵出裏路徑擣山下四面  
仰攻之而戚叅將乃樹白高招一竿于北山下令兵大  
呼脅從者從招下走走者數百人賊復上大山我兵又  
仰攻之賊又大敗奔上界嶺山巔山巔陡峻如柱上平  
廣賊立營其上若蓬麻然只一徑可攀陟丁邦彥等首  
先攀援魚貫上吳惟忠等繼之數賊疾前來從上斫下  
我兵見賊下遂得登頂之我兵盡登賊六  
七賊見我兵戮力大戰賊敗走四散投落坑  
下賊見火四面起賊人突出不可得趙大河親弟趙四  
舉鎗擊之死者不計又四面拆牆石投之賊

急登屋亦用石與鎗投我牆盡各兵逼圍屋下亂投石  
鎗諸物如雨賊不支巢內高屋火炎炎起賊益急亦亂  
投刀鎗諸物出中我我兵鎗筦林立隨格之不一中賊  
燒死者不計而餘孽膽怖魂褫捧銀物擲首頓額哀號  
乞生我兵用狼筈挑其銀物并所擲首疾殺不一顧諸  
物居有頃賊盡死積屍高丈六日戚叅將自戰所班師  
入府城老稚士女歡呼以爲自羅倭毒來無如此捷大  
快也乃壺漿迎道左而唐僉事率府司董實玄黃以迎  
焚死者不在算而共計斬首二百四十四顆生擒者若  
干而我兵亡于陣者止三人陳四陳七十二即前入巢  
放火者王華升一即前山下衝鋒者是時兵寔千五百  
人而一鼓殄二千賊于呼吸間全師奏凱可不謂奇耶

時戚叅將方入城猶衆未罷楚門又報賊十餘艘繫泊  
千江者登梅壘乃急發胡震兵伏截外洋而遣樓楠兵  
陸走至洋坑冒雨大戰楠親斬賊酋一人而朱文林等  
共斬賊十二人生擒一人餘船盡開至長吊洋會前所  
發胡震兵迎敵犁沉五艘燒殘五艘至夜賊拖殘舡出  
海繼光部下兵舡又擊沉五艘追犁一艘昏黑不取級  
而日所斬級二十人生擒賊酋二人次日胡震又於沙  
鏤洋追賊十餘艘至仰月沙賊乃遁懸山我兵用三板  
舡載鳥銃弩手伏壘口候擊之至三更賊果乘雨霧走  
我兵犁沉一艘斬首四餘遂奔回懸山我兵圍之至旦  
日五更賊約百餘人復渡水走至林頭繼光乃督樓楠  
兵由隘頑所迎其前劉意兵由聶王橋徑進紹興府通  
判吳成器兵繼進而知縣徐鉞督鄉兵伏截籐嶺至小  
籐嶺三路官兵夾擊之賊急徑奔吳成器陣成器督戰  
益力賊鎗及成器馬腹成器一矢射中賊面死各官兵  
四面力戰盡殲之共斬首五十一而餘盡溺死五月十  
七日又前犯寧海圍前遁賊十八艘至長沙登劫約二  
千人有竒徧徼益甚砍採竹木欲巢長沙將南攻隘頑  
北攻太平盡髡鉗所掠男子耕作是日繼光在新河聞  
即與吳成器趙大河撫諭兵士示以對大敵之策盡出  
所蓄貲懸給賞格如前下令不許取首級輜貨如前乃  
兵氣益揚而繼光又曰賊巢逼近隘頑所城城又孤危  
賊所泊長沙地又北扼太平之路于小籐嶺東扼松門  
之路于漫遊嶺楚門隘頑二所又勢孤路絕止水路浮

海可援而又為賊船所出沒處柰何乃先令把總李成立單騎馳往松門衛將所練親兵與羅繼祖分舡夜浮海入隘頑城守之隘頑固乃用樓楠丁邦彥陳大成等各立軍令誓狀云事異則分心同則堅遇有征調各營輪日衝鋒以一營當前以一營尾後以一營分翼左右同心并力不計斬獲多寡功同賞罪同罰等議隨用印鈐示衆使各遵守如令繼光亦誓天明神以發十八日至鐵場大雨十九日夜半至大簾嶺分三路進至小嶺偃旗息鼓直趨船所賊始覺分兵迎敵我兵齊擁攻殺遂大披靡四走各兵追殺無一遺者共斬首級數百生擒倭酋五郎如郎健如郎前後數十輩是為長沙之捷每臨陣賊衆將率各將士諭以軍門好生之仁寧無功級不許妄殺脅從一人以故前後被擄者俱得生還前

四月二十日溫之瑞安縣周畧賊由梅頭奔突者五百餘人參將牛天賜通判楊岳把總梅魁等殲之傷而死者不計生得一人斬首十三人餘潰走二十四日牛參將同兵備副使凌雲翼把總盧錡武生黃允中指揮李光佐千戶張榜等兵分三路進勦殺死三百餘人衣紅衣渠魁二人軍中令不許爭首級故斬獲止五十有奇而是日楊岳梅魁陳應等兵由瑞安後路策應生擒斬首共十餘人賊潰出海三十日又賊二百有奇自台州流突樂清縣界凌雲翼預調王欽兵牛天賜督之至窰畧嶺伏截賊遂走雙陡門天賜兵追擊之斬首四十五人餘奔江水死而竄林薄中去者三十餘人至五月一

日追斬于閩浙界上生擒一人温州平而是月四日盧  
鏜水兵舡與海道把總黃應選等船分布青龍港遇奉  
化遁賊七艘向錢倉行外洋去者犁沉三艘值大雷颶  
昏黑溺死漂失者不計撈斬首二十顆是役也計前後  
擒斬共千二十四名級而焚溺死者莫之殫計蓋無一  
人生還者而旬日間三郡寧謐豈徼清平脫遺黎于鋒  
鏑而帖之席懽聲動天地歌舞太平以共戴

天子休德誰之賜歟誰之賜歟我總督公開誠布公能任  
人善將將賞罰明肅碩畫奇計不動聲色而出自淵衷  
賊狀夷情坐照千里又親臨督調先聲奪人所謂心戰  
為上力戰為下者非耶以故將領人人得以自効而白  
水之後以寡克衆而仰攻勅敵兵法所忌然卒取奇勝

此其故何歟寔公用戚叅將趙大河同心選練義烏赤  
城等兵使之有勇知方見利不動故一可當百足赴水  
火雖言各將不能出公右矣而忠誠一念食息不忘捐  
身許國誓不以賊遺君父此又其大者臣無似以書生  
佩刀筆待罪幕下竊所聞于諸將校者退而論撰如左  
掛一漏萬豈足云紀盛事哉聊用稗官所職以備野史  
氏采擇

郵諸生沈明臣撰

海國圖編卷之十

崑山鄭若曾輯男應龍校一編

遇難殉節考

永樂二年武臣一人

六年武臣二人

七年文臣一人

九年武臣一人

二十年文臣二人

嘉靖二年武臣一人

二十九年烈婦一人

三十一年武臣四人 武生一人

孝子一人

烈婦一人

三十二年文臣二人

武臣二十四人 軍人一人

孝子一人

三十三年文臣三人

武臣十五人 應襲三人 武生二人

三十四年文臣十一人

武臣二十五人 武生七人

孝子二人

烈婦一人

三十五年文臣七人

武臣十六人 應襲一人

孝子五人

烈婦九人

三十七年文臣四人

武臣六人

烈女一人

三十八年文臣二人

武臣十人 武生二人

烈婦一人

三十九年義士一人

四十年武臣二人

遇難狗節考

此卷所載名教所關故不嫌特書然事之詳畧悉有憑據或限於耳目之未接或涉於傳聞之疑似者姑闕之以俟同志者增入焉

未樂二年倭犯穿山百戶馬興與戰死之

六年倭入山東于家庄寨百戶王輔死之

犯桃花關寨百戶周盤死之

七年冬十二月倭陷廉州教授王翰死之

翰河東人任本府教授嚴立規程教誨不倦倭寇臨城民皆逃避翰端衣冠端坐明倫堂賊至欲執之罵詈不屈遂為所害

九年三月倭陷昌化所千戶王偉死之

二年倭寇象山縣縣丞宋真教諭蔡海死之

直持竿擊賊海罵賊不屈皆死之

嘉靖二年日本使者宋素鄉等作亂遁入海洋備倭都捕

揮劉錦追之戰死

時有欲追之者問于新建伯王公守仁公曰歸師莫  
遇窮寇勿追但當把截要害縱其退拒其進賊進無  
所獲退無所資將自困絕於是取之兵不  
血刃矣由是兵皆不追錦獨往果為所殺

二十九年寇犯昌國烈婦嚴氏死之

嚴氏葉小九妻也為賊所執驅  
之而前氏知不免遂長河而死

三十一年四月寇入奉化義士汪較死之

較奉化人力挽強弩尤精矢藥受刃精習有司止於  
軍門賜以義士關防賊入應家棚較率民兵射斃十  
餘虜創艾遁去  
較亦被傷而死

賊攻遊仙寨百戶秦彪死之

彪爵谿所人賊登赤坎攻遊仙寨甚急彪曰遊仙與  
爵谿唇齒無遊仙是無爵谿也先入遺我汗馬勳  
死戰而死法何以見於地下乎乃與  
第漢疾馳趨關力不能支遂與死焉

五月瑞安所百戶李潮高良與賊戰於坡南匯瞭高山

死之

賊入黃巖縣孝子王錫烈婦徐氏死之

錫烈求代父而遂  
錫烈至玄奴

保可入孝子續編

六月

三十二年閏三月官兵與賊戰於烈港軍人葺七死之

七定海衛軍賊王直負金塘烈港穴為寇大將俞大  
猷提舟師直入其港計擊火砲大發勝負未決而我  
舟忽挂賊纜增擗不能施賊眾方逞呼曰死取斧投水  
其纜竟連揮斃斧纜斷而死俞舟遂免后四日俞大  
破賊空其穴俞之舟入也有二卒后期當刑因請間  
燒賊碾以贖死俞許之二卒從外海緣山越險幾百  
里晝伏夜行潛抵賊砦時夜近四鼓而賊方碾藥少  
頃困劇而卧二卒即其處爇火火藥橫發羣砦俱燬  
灼賊方酣睡駭而突走墮水死者踵繼俞乘焰進舟  
應芳



嘉靖二年日本使者宋素鄉等作亂遁入海洋備倭都捕

揮劉錦追之戰死

時有欲追之者問于新建伯王公守仁公曰歸師莫  
遇窮寇勿追但當把截要害縱其退拒其進賊進無  
所獲退無所資將自困絕於是取之兵不  
血刃矣由是兵皆不追錦獨往果為所殺

二十九年寇犯昌國烈婦嚴氏死之

嚴氏葉小九妻也為賊所執驅  
之而前氏知不免遂投河而死

三十一年四月寇入奉化義士汪較死之

較奉化人力挽強弩尤精矢藥受刃精習有司止於  
軍門賜以義士關防賊入應家棚較率民兵射斃十  
餘虜創艾遁去  
較亦被傷而死

賊攻遊仙寨百戶秦彪死之

彪爵谿所人賊登赤坎攻遊仙寨甚急彪曰遊仙與  
爵谿唇齒無遊仙是無爵谿也先入遺我汗馬勳  
死戰而死法何以見於地下乎乃與  
弟漢疾馳赴關力不能支遂俱死焉

五月瑞安所百戶李潮高良與賊戰於坡南匯瞭高山

死之

賊入黃巖縣孝子王鏞烈婦徐氏死之

鏞生員王顯之子顯被執欲殺之鏞泣求代父而遂  
死○徐氏名玄奴有異色值母衰病歸寧賊至玄奴  
抱母慟哭賊欲污之玄奴詒賊轉  
室持粧奩同往乘間赴井而死

六月賊陷霽霽所指揮樊懋力戰死之

三十二年閏三月官兵與賊戰於烈港軍人葉七死之

七定海衛軍賊王直負金塘烈港穴為寇大將俞大  
猷提舟師直入其港討擊火砲大發勝負未決而我  
舟忽挂賊纜擱擱不能施賊眾方逞七徑取斧投水  
其纜竟連揮斃斧纜斷而死俞舟遂免后四日俞大  
破賊空其穴俞之舟入也有一卒后期當刑因請間  
燒賊碾以贖死俞許之二卒從外海緣山越險幾百  
里晝伏夜行潛抵賊砦時夜近四鼓而賊方碾藥少  
頃困劇而卧二卒即其處爇火火藥橫發羣砦俱燬  
灼賊方酣睡駭而突走墮水死者踵繼俞乘焰進舟  
應芳

師崩之遂成奪  
巢之功

四月賊犯海鹽孟家堰千戶宋應瀾死之

應瀾字汝觀寧波衛百戶登庚戌武榜授正千戶掌印事執法不撓因而每得下考軍門王公忬獨奇之命取兵船於閩應期而至忬益委以兵客兵曠悍難馭應瀾每約已裕犒而厲以軍法無不聽命癸丑隸叅將盧鏗為先鋒戰上海史家洪追賊至二十里亭復從戰平湖戰白沙灣戰金山皆有功其在史家洪兵北賊追幾及應瀾急反弓二矢而中項洞額親兵飛鎗復殺四人因復圍兵破賊應瀾用是臨陣必以身先士卒竟以疲兵猝當海鹽孟家堰賊不支而死死時猶飛刀殺一賊乃絕事聞應其子襲千戶仍建祠城北隅祀之

賊犯杭州指揮吳懋宣禦之於赭山死之

懋宣率僧兵禦之力戰而死

賊破乍浦所百戶陳綬死之

把總馬呈圖指揮采煉百戶王相姜楫呂鳳姚岑與賊

戰於海寧教場死之

賊犯平湖百戶劉

黃 與戰死之

犯白馬廟指揮蔡

死之

犯南湖把總陳

指揮胡

死之

犯三江港口百戶陳

黃

死之

官兵追賊於海鹽海口巡司千戶王繼隆百戶楊臣康

綬死之

賊陷昌國衛百戶陳表死之

倭賊入城表曰吾力無如之何有死而已但所攝印多吾死置印何地遂送母出城納印於千戶金鰲出門追賊奮鬪而死

孝子劉晉死之

晉昌國人倭寇入城其祖老疾不能行家人各挈妻子走惟晉負具祖而逃賊將及祖曰我老甘死汝宜

速去晉不忍俱被殺

五月賊破乍浦所百戶陳綬死之

參將湯克寬與賊戰於乍浦長沙灣指揮陳善道寇帶總旗張儒死之

十月知事何常明與賊戰於杭塢山死之

常明乘勝追賊中伏而死

十二月賊登西匯嘴千戶張應奎百戶王守正張永死之

三十三年四月參將俞大猷與賊戰於普陀山武舉應襲火斌黎俊民魏本康自死之

斌觀海衛人幼習儒術以母病嘗糞轉甜晨夕告天願以身代及壯應武舉鄉試中式者二慎海寇荼毒生靈請軍門乞隨軍報効累立奇功至是與武舉生黎俊民應襲魏本康阜督水兵追賊於普陀山陷陣先登同時遇害蓋忠孝得於天性者也後其兄指揮同知火雷請於當道為之立祠與俊民並肖像於其中俊民廣東人

賊入上海縣指揮武尚文死之

尚文鎮海衛人從參將湯克寬駐軍上海賊逼縣治尚文率家兵禦之出東門遇賊遊兵輒敗之乘勝進攻賊伏水傍俟尚文過以利刃斷馬足馬蹶尚文死焉

賊屯李家畧義士朱汀與戰死之

汀象山人多勇力素好劍槊賊登赤坎屯李家畧大肆虜掠汀與其黨王永希及子友章等數十人直搗其穴賊棄營走追至開口岩日已晡賊計窮蹙遂返逆戰良久汀為流矢所中猶手刃數賊力不支顧謂其子曰吾已無濟汝等宜速去子不忍舍與王永希奮力直前格戰俱死焉

賊攻松江府副千戶童元巡檢李叢祿死之

九月賊攻嘉興府官兵追之戰於孟家堰指揮李元律千戶薛綱宋應澗死之

賊犯百家山百戶趙軒梁踰死之

賊寇沈家河都指揮周應禎死之

十月百戶張曜與賊戰於湖頭死之

賊至東陽南午嶺巡檢朱純死之

賊犯芙蓉海口指揮戴祀江九山千戶崔海鎮撫劉或百戶易坎死之

十二月賊入嘉善縣百戶賴榮華死之

詳見浙江倭變紀

三十四年正月賊犯湖州官兵敗績副理問陶一貫守備周全指揮孫勇百戶陸陵周應辰把總官梁鄂武生

郭周張景安朱平姚清死之

詳見浙江倭變紀

賊陷崇明縣知縣唐一岑死之

詳見直隸倭變紀

四月賊犯瑞安縣守備劉隆千戶尹死之

隆字大昌定海衛指揮使以強幹屢協總諸衛備倭時海上寇起許二陳思昭最盛隆謀攻之適思昭入康頭隆提舟師薄之而我舟忽膠隆股中一流矢見血益奮怒揮諸舟競進卒破賊俘四十餘人斬百餘級壬子廷把總嘉興統舟師備乍浦當松江七團賊歸隆扼之焚沉賊舟俘斬幾三百級會破史家浜賊又扼之沉賊舟激浦外洋一日追賊向暮黃霧四塞隆以孤舟在賊圍中逮曉從兵皆懼隆大喊作氣發一地雷衝沉十餘舟俘斬二百餘陞署都指揮僉事守備溫處至是寇數百將薄瑞安城隆整兵遽出欲折其鋒偏將尹千戶者請旋師避之隆不聽徑往遏之殺賊十餘人賊遁去回軍至田間有數賊伏莽中遽起擊隆不及應遂死尹千戶等俱死焉事聞贈都指揮僉事仍世襲焉

賊犯慈谿義士魏鏡死之

鏡生有絕力善格開闢寇至海濱輒自奮日誰無一死者死而能衛桑梓庶幾為義鬼矣賊由餘姚至鳴鶴從知縣曹本率眾禦之兵潰鏡負令而走賊追之踰杜湖嶺而南乃操刃衝敵殺數賊賊傷其額猶力聞不置而死

百戶劉夢祥與賊戰崇丘死之

夢祥定海衛人領兵船出海遇賊登犯崇丘夢祥即部兵登陸與賊大戰獲賊首數級力乏寡援遂死賊刃當道憫之為立祠祀焉

賊犯鳴鶴鎮孝子沈良十死之

良十時年七十餘尚有九十餘母賊至良十負母至五里外力竭不能行息山谷中賊追至乃跪拜請死願貸其母賊見母子俱睡髮類老舍之而去良十憐母饑渴方圖飲食賊又至或舉刃欲研其母良十以身覆母號哭遂被殺而母竟得全

常熟縣知縣王鈇致仕叅政錢泮死之

詳見直隸倭變紀

賊攻無錫縣孝子監生蔡元銳烈婦蔡氏死之

元銳無錫人軫之子寇至家人奔散元銳以父年老獨留扶父登屋以免元銳被執賊欲降之不屈遂遇害其女蔡氏適同邑陸子才歸寧遇變與其婢阿滿招女二共義勇婦徐氏同登一舟將以避難賊悅其色欲汚蔡氏盡出簪釧求免不聽乃詒賊曰過汝舟當從爾賊喜獨一人與携手而往蔡氏齧傷賊手投溺水中其婢皆隨溺焉無何其弟元鐸以兄陷賊中持銀往贖知兄已亡乃罵賊而死

五月千戶韓綱百戶葉紳與賊戰於七里店及樟村死之

綱紳皆寧波衛官紳少不羈習手搏善雙刀賊入橫石橋紳偕千戶劉英領兵策應至七里店紳奮雙刀奪橋獨進應者不繼遂為所殺後二日賊西流至樟村綱復領兵防遏猝與賊交兵潰挺身獨戰亦死之

遊擊將軍周藩與賊戰於朱涇死之

賊犯鳴鶴省祭官杜槐死之

槐慈谿人。家濱鉅海，儻遊俠，輕財好施，為書掾。從  
延綏撫院，巡歷邊徼，險要有抵掌。伊吾之志，省祭歸  
值倭寇屢犯內地，從估客得鳥上，狡慝狀曰：患將滋  
蔓，遂散家貲，結驍勇，傾身下之，得士死力，值縣僉其  
父文，明為部長，令團結保障，槐傷父老，以身任之。癸  
丑寇薄觀海衛，城槐曰：衛破則無縣矣。一呼而辟勇  
俱集，直前斫賊，賊走，衛遂得全。至是賊犯鳴鶴，槐率  
衆迎擊，賊走，餘姚東山，槐越境追之，謀言賊飯空，舍  
提刀赴之，賊伏墻隅，槐揮刃中石，刃缺，賊競出，槐與  
五六健卒當之，自午至酉，鏖戰不已，戮其衣，緋渠帥  
竟以力竭昇歸而死。後賊見黑旗，即驚曰：杜兵至矣。  
父文，明痛其子死而麾下壯士皆願從，文，明殺賊以  
復仇。後賊燬鳴鶴，文，明冒死出縣，令於重圍中。是年  
冬，寇自黃岩犯寧海，海道激文，明偕主簿畢清，邀擊  
之，遇於奉化，颯嶺之麓，據高臨下，布陣方定，而土兵  
遽走，杜兵力不能支，文，明遂與畢清俱死焉。事聞  
詔贈槐光祿寺丞，文，明府經歷，卹死所  
立祠祀之。仍廕子入監肄業云。

八月指揮張大綱生員陳淮與賊戰於蘇州橫涇死之

大綱，處州人，驍勇異常，率坑兵擊賊，手刃數人，力戰而死。○淮，崑山人，知縣周之子，善弩，與友人潘蔚卿等相期滅賊，時賊精悍異常，兵士遇之輒潰，淮獨與家兵二人力戰而死。

九月官兵進搗陶宅賊巢，指揮邵昇、姚泓生員于岳死之

昇等陷陣殺賊，賊已大敗，乘勝進攻，賊死守港岸，昇等身先士卒，賊乘高刺下，故皆死之。

十月主簿畢清與賊戰於楓嶺死之

清善射，累立戰功，至是陣亡，人皆惜之。

監生謝志望與賊戰於餘姚斤嶺死之

志望統兵設伏誘賊，大敗之，乘勝逐北，賊死，聞志望手射死三賊，矢盡力竭，遂被害。

十一月賊攻鎮東衛千戶戴洪等死之

洪與高懷德、張奎皆本衛千戶，出城禦敵而陣亡者也。揚一茂、白仁、丘球皆平海衛千戶，追賊於東岳山而陣亡者也。

百戶劉愍與賊戰於麻園死之

生員胡夢雷與賊戰於東關死之

夢雷餘姚人與堂兄應龍操六等率鄉兵報効手刃數賊力竭而死

儒士金應賜與賊戰於毋婆嶺死之

應賜山陰人

閏十一月守備劉隆千戶劉綱百戶張澄與賊戰於瑞

安三港死之

詳見浙江倭變紀

賊犯平陽壘指揮祁嵩死之

指揮閔鎔義士吳德四吳德六與賊戰於舟山死之

德四德六兄弟本慈谿濱海農夫少有膂力先是寇上平石經其廬驅其黍黍德四持鋤自田歸遇寇於門揮鋤中賊腦仆地德六取賊刃追殺一渠魁遂以壯勇有聲隸杜槐部每遇敵即衝鋒奪旗以為常至是海道聞其名檄往攻舟山險寨德四直前砍賊渠于轅門寨內驚擾操而出怯卒皆返旆走而賊砍德四蹶德六呼曰兄死矣獨前殺其殺兄者後兵不繼亦死焉

三十五年正月參將尙允紹興賊戰於松江四橋死之

三月福建總督倭劉烱千戶王月與賊戰於石壁嶺

死之

烱字大光世為寧波衛指揮使年二十襲父爵用御史林應箕薦升薊州軍門把總未幾又用薦陞福建總督備倭至是福清縣倭賊登岸據海口鎮官兵屢挫烱領兵夜襲其巢遂奔潰由古田寧德望海而遁烱即提兵由捷徑宵行趨寧海縣石壁嶺要賊歸路北至嶺隘倉卒布列未備而賊已至部伍散亂止家兵數人及千戶王月在側烱顧謂持印者曰亟為我歸印

朝廷

吾世受國恩死矣烱即挺身執鐵鉞格殺三人盡無援賊衆擁至斃於賊刃所揮鐵鉞尚堅執不墮其勇烈如此御史吉澄上於朝廷立廟祀之

賊犯海鹽轉塘灣指揮徐行健死之

四月賊犯青田縣百戶方存仁死之

温州府同知黃釧禦賊於分水嶺死之

時賊自福建入浙境，劔以孤軍禦之。於境外分水嶺，賊過桐山，劔率官兵勇敢當先，連戰數合，賊大敗走。既而賊分支，逃我兵之後，劔遂力戰死之。蓋自有倭患以來，文臣死事未有如此者也。

### 賊犯寧波孝子聞宗時死之

宗時，郵人教授，聞理子性至孝，幼喪母，奉繼母陳承順。篤至賊至，舉家竄避。宗時扶父出，而遇賊，脇取金銀，不得欲殺其父。宗時以身翼蔽，泣求自代，遂被刃而死。尸諸田間，父遂得什時家奴李三抱宗時幼子，不忍舍去，亦被賊刃，截左耳併刳其面，屢死，倭甦人共傷之。

### 賊犯崇德佐擊將軍宗禮鎮撫侯槐何衡忠義官霍貫

#### 道死之

禮，故燕驍將也，侯槐、何衡、霍貫，道皆其偏裨，所統箭手九百，皆精悍絕倫。所向無敵，剿賊徐海部，領萬人自烏鎮而來，勢將犯杭。浙江官兵無足恃者，禮獨與麾下據三里橋而陣，張左右翼以待戰。數合，擊殺數十人。會日暮，賊且引去，時賊氣頗窘，而禮與貫道等亦已絕鄉導，不得擇善地，便水草，時欲食以自休。止明日，餒而戰，賊遣候者樹而望，蓋孤壘以壘，無他援者也。大喜，後縱兵前後夾擊，禮與貫道大呼力戰，矢

石如雨，無不人人一當十，復擊殺數十人。貫道亦手刃十餘賊，益怖海，且中砲欲墜。會火藥盡，貫道面禮二人皆仰天呼曰：吾兩人一得樂，數斗可以了此賊矣。既而賊分番死，鬪禮與貫道，力竭矢盡，俱死焉。

### 賊犯嘉興指揮程祿死之

詳見浙江倭變紀

### 千戶沈宗玉王世臣與賊戰於金山江中死之

宗玉鎮江衛後所正千戶，世臣左所副千戶，同領兵船追賊，歿於江中。

### 賊攻江陰知縣錢錚死之

詳見直隸倭變紀

### 賊犯揚州都指揮張恒千戶羅大爵百戶魯沂死之

戰於八里鋪灣頭等處，大爵沂陣亡，恒傷重而死。



賊犯揚州小鐵口同知朱哀高郵衛經歷晏銳應襲賈

思死之

賊陷慈谿生員戎良翰死之

良翰定海縣增廣生員性峻介義不苟合素以忠孝自許賊陷慈谿良翰家靈緒慈孀甚邇乃倡義集兵僅得百餘人與賊格殺斬首二級賊披靡而去已又遇賊於丘洋良翰奮勇力戰賊方蟻聚竟不能支遂為流矢所中立死監司為之禮葬及表其門

孝子生員馮履祥向叙王應麒死之

馮履祥字君德慈溪人生七八歲即警悟好讀書嘉靖王子補邑庠弟子員至是賊猝犯縣履祥隨父出奔賊遁斷父左手且裂其背履祥以身蔽之泣訴曰此吾父也願無加害寧殺我賊竟殺之其妻袁氏遁於靈山時孕已彌月夜夢一紅面神告曰爾夫為父死不可使無後吾當與爾一子產時無患次日婦果生一子又值倭寇將入賊馬皆止策之亦不前賊不越境而回一方稍輯人謂靈山神驃騎大將軍神感之庇與得兒夢符蓋履祥孝感所致云云何叙字敬禮慈谿人獻令七世孫孫幼慧而有高志舉動擬步古

人年十六入府庠文藻驟發而操履端謹人益器之至是賊入縣叙披母而逃遇倭東溪踏叙仆地直前破其母叙急起抱母頸連呼曰寧殺我賊

詔旌

其門○王應麒慈谿人年十七就學習文天性至孝倭寇卒至應麒扶母姜氏媮余氏奔匿鄰圍賊窺見二婦輒拔刀追之二婦亟赴池水余氏溺死應麒見母遇害以身翼蔽賊亂刃之子毋傷甚賊退應麒隨卒姜氏亦死

烈婦桂氏張氏章氏周氏馮氏柴氏孟氏孫氏烈女茅

氏死之

桂氏阿寶女姜阿龍妻慈谿人方少艾賊至桂與衆婦走匿馮氏僻室室後有池賊搜室衆婦執赴池賊以手挽之桂絕袂而死○張氏慈谿馮警妻唐孝子無擇之後年二十歸於警纔六年遇倭寇之變邑治焚燹張氏偕姑竄匿其夫相失為寇所殺張哀號亟收夫屍殮殮未數日寇復至張偕姑及妯娌買舟逃至晉山江為寇所及張知不免曰且汚賊手然馮之嗣不可絕也即以幼子付其姑借伯之妾徐氏即沉於江賊大驚異遂舍舟中諸婦以去三日屍浮於江家人收之合葬於警○章氏沈祚妻周氏沈希

魯妻馮氏沈信魁妻柴氏沈惟瑞妻孟氏沈弘量妻  
孫氏沈琳妻沈氏慈谿里橋巨族家界於觀海鳴鶴  
之間家衆二千人多駭黠善聞自嘉靖以來海上多  
事寇上塢山燬鳴鶴縱橫蹂躪沈氏不惟自衛且能  
殲其衆魁奪其所掠賊甚讐之至是賊大至沈氏豪  
誓於衆曰無出婦女無輦貨財誓以死守不能者先  
戮之章氏誓於內曰男子死鬪婦人死義辱與死等  
可衆婦皆踈聽既而賊圍沈氏群婦聚於一樓賊散  
入戶章氏遽出投於河周氏馮氏繼之以死一所柴  
氏方爲大礮刃賊已斫戶入矣柴即以刃所賊旋自  
刃孟氏孫氏姊妹爲賊所得相持不放詈賊不屈奪  
賊刃自刺皆殲焉思橋之難沈宗婦死難者三十餘  
其六人尤烈者也○茅氏慈谿人年十四父母亡獨  
與兄嫂居其兄痿卧賊入縣嫂出奔呼之行女曰吾  
室女也去將安之俱去孰寫扶兄賊至遽縱火女力  
扶其兄避於空室俱被燔灼而死二屍相變縮焉

五月巡檢劉岱宏與賊戰於仙居縣東嶺死之  
無爲州同知齊恩與賊戰於圖山江中死之

恩陝西隆德縣人祖敏知四川蒲江縣殺賊有功與二子俱死於賊  
而爲立祠恩廕入國子監授序班迂河曲知縣禦寇脩邊  
有功撫按保留久任九年考績迂無爲州同知閩東

南父罹倭患竭忠圖報練兵衣械一毫不取於民長  
江賴以保障賊犯上流奉撤卽率子孫叔姪兄弟凡  
十二人領兵赴敵一至圖山卽身先士卒鼓衆而前  
殺賊數多賊遂畏懼奔潰乘勝逐北悞中賊伏誓戒  
國難由是舉家赴敵至於力竭勢窮又曰兒輩勉存宗  
祀吾與此賊誓不俱生由是次子齊嵩等四人得脫  
恩與長男尚文孫童叔仲實第寶榮姪友良大卿力  
戰不屈俱死于賊一門忠義自有倭  
患所未有也人以爲克絕祖武云

賊犯定海烈女傅氏死之

傅氏定海昌國傳梓女也年甫十七美姿色未嫁寇  
猝至女家故瀕海遂爲賊所得女卽以石自破其面  
流血塗地  
賊怒磔之

六月百戶帥印與賊戰於青村得勝港死之

印新安衛百戶率廣兵追賊  
至得勝港兵潰印力戰而死

八月官兵進搗沈庄賊巢義勇劉進死之

時賊巢甚堅官兵難於進攻進首抱火器渡河焚賊  
巢廬舍火既熾賊亂官兵乘之遂大捷進傷重陞屋

以死蓋忠勇異常者也惜無父母妻子故其功莫酬焉

九月百戶郎官與賊戰於臨海縣兩頭門死之

官兵與賊戰於鴈門嶺生員倪泰員死之

泰員餘姚人少倜儻有膽氣憤倭荼毒生靈募家兵四百從湖廣守備楊縉擊賊於定海之龍山三戰三捷乘勝追賊泰員率兵獨抵賊巢殺賊頗眾值天暮賊出死關兵疲勢孤泰員與家兵四十二名俱死於賊

官兵搗乍浦賊巢土官汪相向變死之

十二月官兵與賊戰於舟山冠帶把總莫翁送死之

翁送桑麻土兵頭目也

嘉靖三十六年四月賊攻海門衛應龍俞憲章死之

憲章百戶之子

五月都指揮沃田冠帶把總岳君寵與賊戰於天長死

之

先是田統鎗手三千名守瓜儀賊犯天長操江都御史高公委領兵一千與都指揮焦鯤應援賊衝入其營鯤等潰走田與君寵及家丁封漢等力戰而死

三十七年正月賊陷蓬州所百戶李日芳等死之

三月百戶秦杭與賊戰於梁灣港死之

杭蒲岐所百戶先以軍門委領白岩塘兵船守青巖門至是與賊遇於梁灣港力戰死之

四月致仕僉事王德與賊戰於龍灣死之

德永嘉人原任廣東僉事憤倭流劫募集義兵二千水兵二百剿之與賊遇於龍灣殺賊數十既而伏賊四起德被圍死戰遂遇害

賊犯太平縣典史葉宗死之

宗太平人原任典史因事去職

良醫王沛與賊戰于梅頭嶺死之

沛字崇大以例授良醫七品散官歲壬子倭寇海濱崇大首倡大義招集義兵七百餘人團練保禦屢建奇功後因從子廣東僉事德致政而歸加募勇壯至一千五百有奇伺後與賊戰龍灣戰長沙皆有戰績至是與賊戰於梅嶺賊眾大至沛舉寡不敵遂死之

指揮劉茂朱廷鑰千戶周賓白戶李爵劉源等與賊戰於白巖塘死之

茂盤石衛指揮使廷鑰温州衛指揮僉事賓浦岐所正千戶爵蒲岐所百戶源盤石右所百戶

五月賊犯惠安縣知縣林咸與戰死之

詳見福建倭變文紀

六月觀海衛百戶

與賊戰於柯梅死之

賊犯昌國烈女李氏死之

李氏昌國人寇至執李欲汚之李罵賊不屈竟死之

十月賊掠磚頭北塔守備楊篋與戰死之

時官兵每有斬獲賊輒奪其屍去篋因貪功力戰而前故死之

嘉靖三十八年三月賊犯樂清三空嶼千戶胡鳳朱璠胡

珊百戶姚憲死之

鳳等從參將張鈇禦賊於奎嶼賊伏麥田中俟官兵將半忽起殺官兵大潰鳳等遂遇害

官兵與賊戰於奉化之江口橋武生蔡啓元死之

啓元廣德人從叔監生蔡汝蘭勤王擊倭奴累戰功授千夫長至是我兵當賊於江口橋行列已定鼓而向賊同行者俱錯愕不前啓元獨憤怒裂毗耻言不休徑匹馬橫而前與賊逼賊駭或走或伏啓元手格殺數人會天雨馬行淖潦中不得出力竭矢空顧左右皆散去僅第昆元與二三家僮不去啓元怒益甚瞋目揮劍罵賊曰吾不啖汝肉非丈夫也獨死戰良久賊乘間涉河統其背鎗之死踰時猶怒立馬上不墮人共壯之

四月官兵與賊戰於灣頭千戶蕭

百戶蘇 死之

千戶趙世勳鎮撫韓胤與賊戰於如臯死之

官兵搗廟灣賊巢千總沈儒死之

儒故驍將至是從南路入水手燬賊船為賊礮所中而死

賊犯象山烈婦丘氏死

丘氏象山人王憲維妻賊劫西山至憲維室時夜分賊妍其色欲汚之丘氏不從執木捍擊之中賊首賊以刃刺其腹而死

八月參將丘陞與賊戰於七灶洪死之

陞北方驍將也歲丁巳倭犯淮陽陞提兵應援屢立戰功寇平督府因留之每戰輒身先士卒凱旋則歿後行賊見輒為引避至是單騎擗戰故遇害

十一月指揮夏正為王直黨所殺

正故通事屢立奇功奉例納級報劾軍門王直之來也擁兵觀望禍且叵測正密領胡公方畧入直所為死間直既就擒毛烈收其衆議為復仇正又說攜其黨烈怒欲殺之正不為屈遂為烈黨支解而死事聞贈都指揮使廕一子為正千戶云

三十九年三月冠帶義士沈講與賊戰於走馬溪死之

四十年五月百戶徐昭與賊戰于海山外洋死之

百戶焦涇追賊出海死之

涇隘頑所百戶

兵備副使凌雲翼云哨探者兵之耳目也哨探既真則  
已近岸各違失措甚則我船亦有被擄以爲賊資者  
今後把總官務要督同各哨官員多置蜈蚣梭船精  
選熟知水性之人遠出外洋分投哨探如有聲息先  
來傳報其附近各港官兵一聞警急隨合艚約會截  
擊大洋庶可獲制勝之功如賊從某官某信地登岸  
把守官不先期傳報附近官兵聞報不即時策應以  
致深入腹裏貽害地方聽本道查實指名叅究坐以  
失候重罪其有與賊相拒衆寡不敵者原情另處庶  
人心兢惕海防可固矣



